

四庫全書

史部

欽定四庫全書

史部

平定三逆方畧卷

十六至二十

詳校官編修

臣曹振鏞

編修

臣裴謙覆勘

總校官候補中書

臣潘有為

校對官中書

臣李斯咏

謄錄監生

臣鄧延曾

欽定四庫全書

平定三逆方畧卷十六

康熙十四年閏五月生辰

詔責湖廣諸將

大將軍順承郡王勒爾錦等奏逆賊兩路出犯  
荊漳均州與我兵對壘邇來虎渡口諸處賊船  
日增聞逆賊吳三桂身在松滋聲言渡江與我  
兵戰且欲決堤水灌荊州使我岳州大兵不得

援荆今三桂既親犯荊州餘賊或犯他處亦未  
可料賊勢甚熾我兵力單請發滿漢官兵速行  
赴援

上責之曰初聞吳三桂叛即發大兵遣前鋒統領碩岱  
都統巴爾布護軍統領伊勒都齊率前鋒護軍日給  
芻秣令其疾馳巴爾布等至荊州時賊尚未至常德  
澧州也所率前鋒護軍每佐領五人兵力不為弱矣  
乃遷延不即渡江而常德澧州遂叛王親率大兵至

荊州又不即渡江進取致令吳三桂至而常德等處  
竟為賊據都統珠滿率兵至武昌時岳州長沙猶未  
叛也又不急趨鎮守而逍遙武昌六百里之程行逮  
一月而岳州長沙又陷巴爾布等畏懦不前坐失險  
要使逆賊從容得據守湖南致我兵難以攻取且糜  
費糧餉倍於他所究之寸步不能前進因賊渠與我  
精兵相持荆岳間而廣西孫延齡福建耿精忠遂相  
繼叛變賊寇蜂起又前諭王云荆河口以內何處宜

設兵防守王疏稱賊船上下江中俱取道荆岳易以偵知俟有事之時就近調遣可以速至今復稱三桂來犯荊州餘賊或從他路出賊衆我寡特請增兵何前後舛錯一切軍機忽畧如此今禁旅遣發已多縱發亦難驟至但時方盛夏賊或拚命渡江應調附近官兵星馳赴援今安親王復建昌大兵已回南昌江南徽州又有滿洲蒙古兵鎮守其令駐池州署副都統蘇朗率蒙古兵一千至武昌換兵五百速赴荊州

至鄰省綠旗兵各守地方無可調遣安親王或由寧州入湖南或由袁州進長沙其便宜以行既大將軍

簡親王喇布奏江西賊寇窺伺池州諸處

上乃命蘇朗止以蒙古兵六百行到日合武昌滿洲蒙古兵仍足一千速赴荊州

甲午

賞陝西蒙古綠旗官兵

上諭戶兵二部將軍張勇總兵官王進寶孫思克提督

陳福標下官兵及進寧夏蒙古兵効力邊疆勞績可  
嘉應發銀遣官由邊外運至軍前賞賚示朕優卹之  
意其兵餉俟路通速給

臣謹按帝王之道行賞以為天下勸所以酬  
勲旌伐激勵三軍也是時張勇等標兵及蒙  
古兵雖効力邊疆尚未立有顯功而

皇上乃命所司發銀由邊外運至軍前賞賚蓋答其前  
勞策其後効德意至深遠矣其他行間將士



凡有勞績者必加之恩賜靡有所遺迨後王  
師征討底定疆圉所在官兵靡不奮其材武  
共奏膚功良由

皇上推恩拊循能盡鼓舞之方故也

乙未

命將軍貝勒察尼帥師赴荊州署副都統諾敏統兵赴  
襄陽

大將軍順承郡王勒爾錦奏松滋縣北山吳三

桂復添四營沿江一帶賊船日增恐水陸齊犯  
荆彝亦未可定

上諭荊州彝陵諸處關係最要將軍貝勒察尼酌量留  
兵令都統伊里布范達禮防守襄陽均州南漳諸處  
親統餘兵速赴荊州又令往駐河南汝州署副都統  
諾敏副都統孫承祖率所部滿洲漢軍星馳赴襄陽  
已亥

命大將軍安親王岳樂分兵取饒州

總督董衛國奏樂平諸處逆賊乘間來犯復臨

饒州

上諭安親王速回南昌固守疆界居中調度分兵收復

饒州

乙巳

命副都統龔圖領兵駐河南府

時左翼四旗察哈爾兵皆感

皇恩願立功自効

上因命察哈爾兵赴河南府駐防恐其難以鈴束復令  
每旗出驍騎五十人副都統龔圖統領前往

庚戌

命革總兵官金世需等職斬副將馬郎阿於軍

先是大將軍順承郡王勒爾錦奏五月初五日

逆賊突犯穀城縣城失守提督李胡拜陷賊副

將馬郎阿總兵官金世需劉文奇楊茂烈俱退

走

上諭穀城失守提督李胡拜臨賊副將馬郎阿總兵官  
金世需等並皆退奔國家軍令素嚴未嘗有此馬郎  
阿等何以不顧提督遽自退歸范達禮駐襄陽去穀  
城甚近何以事前不為預備臨事不相應援今當大  
兵四出軍令豈容寬縱貝勒察尼速勘密奏至是察  
尼訊鞠上

聞

上命斬馬郎阿以徇革金世需劉文奇楊茂烈職令擊

賊自効

壬子大將軍安親王岳樂奏官兵復廣信

將軍額楚等進取廣信沿途敗賊恢復萬年等縣前至弋陽賊將蔣德宏率兵五萬以木石斷西崗橋於城北樹木柵為九壘偽總兵柯昇以五千人自廣信來援別營為六額楚同土默特都統巴札爾等分布滿洲蒙古官兵擊敗之斬賊二萬餘隨進兵於是月初四日抵廣信賊已

遁去遂復其城

提督陳福奏恢復花馬池

時賚圖叛據花馬池提督陳福率綠旗官兵會同索訥木貝勒下蒙古兵自寧夏進圍花馬池屢敗賊援兵賚圖勢急於是月初八日降花馬池平

六月甲子大將軍安親王岳樂奏官兵復饒州

將軍希爾根進取饒州閏五月二十六日敗賊

於餘干疾馳抵萬年復其城二十九日至饒州  
賊先一日遁饒州遂平

已已

申命將軍貝子傳喇塔詳奏軍中情形

上諭傳喇塔曰據報賊糧匱兵怨欲來投降以隔江不  
能遽至前以地遠不能詳悉賊情故令爾將逆賊情  
形具報爾宜將水陸賊壘地方形勢賊將姓名及我  
兵見壁何處可否進戰一一詳報迺畧而不言但云



賊糧匱兵怨殊未明悉著再詳奏以聞既傳喇塔報  
曰陸營賊將偽都督魯養性偽將軍祖宏勳其  
下有偽總兵八人馬兵六千南自長石嶺北至  
三江延袤數十里連屯二十五營其領水師者  
賊將朱飛熊偽都督張恭萬許英其下有偽總  
兵四人水師萬餘舟三百餘泊城東十里小梁  
山下四月初十日我兵擊賊殺朱飛熊於茂頭  
至如台州寧波紹興杭州俱逼海濱不設水師

似難取勝初得仙居即議進攻黃巖因賊據茂  
平嶺黃巖路斷我兵未能前進近聞有土木嶺  
可以間行自台州至黃巖三百里內不能行馬  
者四十里賊恃險故勿守今已密啟康親王濟  
師俟其兵至進取有期矣

辛未大將軍貝勒洞鄂奏復秦州

洞鄂等於三月初四日抵秦州圍其城四月二  
十日賊萬餘自四川平涼來援又賊八千餘自

城內突出我兵分道迎擊大敗之嗣屢戰屢捷  
總兵官孫思克又奉調自鞏昌率兵來會賊驚  
懼偽總兵陳萬策等率兵民出降賊將巴三剛  
等遁走閏五月三十日復秦州

甲戌將軍畢力克圖奏復綏德州

畢力克圖引兵自大同赴榆林是月初三日至  
謝村分兵三隊令護軍統領傑殷等率之先行  
傑殷等乘夜進發黎明軍河上賊三千餘拒守

楊家店渡口我兵鳴角盡渡賊披靡遁去翌日  
克吳堡縣城遂趨綏德初八日遇賊於胡爾崖  
口復擊敗之於時朱龍遁走定邊餘城出降綏  
德平

乙亥

命調岳州戰船赴荊州

大將軍順承郡王勒爾錦奏逆賊逼犯彝陵兵  
衆船多又於虎渡口諸處轉運糧餉火器宜急

斷其運道但斷水路必須戰艦今荊州但存沙  
唬船四十若盡發往則虎渡口見有逆賊不可  
無船分半則兩處俱不足用

上乃命大將軍貝勒尚善發岳州沙唬船四十艘速赴  
荊州

丁丑

命前鋒統領覺羅舒恕領兵援廣東

先是平南親王尚可喜等奏海澄公標下遊擊

黃藍來會城請援兵臣即與將軍尼雅翰議發  
滿漢官兵赴援尋原任總兵官黃芳泰來言本  
月初三日海寇圍漳州臣思潮城未克閩賊方  
張目下在在需兵更有意外之虞勢必至於東  
手請就近速調大兵來援廣東

上命安親王每佐領發滿兵一名令副都統一人率赴  
廣東至是將軍尼雅翰疏言粵東四面受敵廣州兵  
力又復無多今平南親王年力漸衰臣又才識

短淺若隣近有警恐難支守乞令見在江西護  
軍統領桑格率兵前來總統兵馬則粵東可保  
無虞

上諭護軍統領桑格仍留江西所發每佐領兵一名令  
前鋒統領覺羅舒恕率赴廣東同將軍尼雅翰商酌  
以行

已卯

命大將軍貝勒洞鄂分兵援漢中

總督周有德等奏報本月十八日關山賊遁

上諭漢中要地應速發援兵今秦州關山既復著大將  
軍貝勒酌撥兵每佐領一名或二名令大臣一人率  
赴漢中應援席卜臣等兵其貝勒等大兵或約將軍  
阿密達夾攻平涼或先勦川賊速議以聞尋洞鄂奏  
撥兵一千五百名付將軍佛尼勒同副都統德  
業立喇布重等開棧道以援漢中令副都統翁  
愛率西安兵同綠旗兵守隴州仙逸關諸處都



統海爾圖等運紅衣礮至平涼

平定三逆方畧卷十六

欽定四庫全書

平定三逆方畧卷十七

康熙十四年七月丁亥朔

命將軍阿密達等速定平涼

阿密達奏言王輔臣親領精銳及秦州逃出餘

孽畢集平涼慶陽羣盜依山結壘臣以孤軍前

進恐未易奏功乞

勅將軍貝勒洞鄂等酌量留兵駐守秦州餘兵盡會平

涼提督陳福及鄂爾多斯兵令其攻取定邊固  
原并遏賊慶陽之援臣率在涇兵出白水由平

涼東面進攻則下平涼較易

上諭曰兵貴神速機不可失平涼逆賊聞大兵克取秦  
州衆心驚擾我兵宜乘勝長驅攻取平涼將軍阿密  
達逗留不前殊屬非宜前曾添發兵馬近總督周有  
德又將紅衣礮運送平涼阿密達當尅期攻取如勢  
有未便當移會大將軍貝勒等會商夾勦之策再勅

提督陳福速取定邊固原將軍畢力克圖等急定延  
安移師平涼會勦

庚寅

諭赦耿昭忠等罪

上諭吏兵二部耿精忠背恩附逆煽亂閩疆荼毒生靈  
罪惡重大兄弟親屬律應不赦但念其祖耿仲明於  
太宗文皇帝時航海歸誠効力行間著有勞績其父耿繼  
茂於

世祖章皇帝時亦効力行間鎮守邊陲今精忠雖行同禽

獸上負

國恩其弟昭忠聚忠及親族屬下人等道途越隔實未  
同謀竟爾株連朕心不忍其概從寬典盡釋之所有  
官爵悉令如故

臣謹按負國之賊必加以族誅用懲亂逆耿

精忠世受

深恩叨襲王爵不思竭誠守節報塞

高厚乃妄行煽亂荼毒封疆惡極罪大戮及九族於法  
允宜況昭忠等係精忠親弟尤不可赦而我  
皇上猶憫其先人曾經効力且念昭忠等道途隔遠未  
與同謀免死宥卑服職如故即其他逆犯  
族屬法應同坐者往往予之寬貸不忍悉誅  
如天好生之仁誠度越千古矣

將軍畢力克圖奏復延安

畢力克圖率兵自綏德趨延安六月二十五日

逼城而陳賊宵遁遂入延安乃分兵追賊於宜  
川縣斬獲甚衆連復宜川保安塞延安安定諸  
縣

申諭王輔臣

勅曰吳三桂為逆人心驚擾懷疑瞻顧者多惟爾知守  
臣節出首逆書遣子繼禎入奏朕甚嘉之是用錫爾  
世職官爾子卿貳以勵忠悃後經略莫洛率師進蜀  
調遣失宜變生倉卒爾被逼脅陷於叛亂朕聞之未



忍加誅即遣爾子往諭蓋謂爾封疆舊臣屢受國  
恩自當悔禍來歸不意爾反生疑畏竊踞如故殊負  
朕至誠惻怛之懷近大將軍率諸將已破秦州蜀寇  
相率竄遁平逆將軍又取延安蘭州鞏昌以次底定  
大兵雲集平涼滅在旦夕但平涼兵民皆朕赤子克  
城之日必多殺傷以爾之故而驅民於鋒鏑朕甚不  
忍今復勒爾自新若果輸誠而來豈惟洗滌前非兼  
可勉圖後効爾標下官兵及地方文武官民諸當坐

者概行寬宥其拘留祝表正之罪悉赦除之朕為百姓主務期保全以靖民生慎毋愆瞽自干天討負此殊恩雖悔曷追爾其欽哉

臣謹按行師之道撫勦不同至於戡亂安民其意一也時王輔臣負

恩反叛稱兵秦隴之間六師致討無難撲滅而

皇上念叛寇固當殲除但陷賊良民皆吾赤子慮兵威所及玉石俱焚故先遣其子往彼宣諭旋頒

勅旨特行招撫迨輔臣執迷不悟復陳利害以曉示之  
諄切再三必開以自新之路者蓋欲免秦民  
之塗炭亦所以保全輔臣也使輔臣稍有人  
心捧誦

德音自當感泣悔罪束身請降夫何反覆成性狙詐多  
端累次招徠終不悛改

皇上鑒度情事謂非以兵威重創之不能使之革面乃  
授圖海為大將軍往督官軍大敗其衆於平

涼城北輔臣惶迫始俛首來歸

皇上撫勦兼施恩威並用神武不殺之概於茲益著矣

丙申

命都統噶爾漢為鎮安將軍帥師駐河南副都統龔圖  
等帥師自河南赴荊州尚書科爾擴岱等帥師守  
兗州

時理藩院尚書阿穆瑚朗奉

命調科爾沁等部落蒙古兵三千人期以八月先後入

京

上諭授都統噶爾漢為鎮安將軍率每佐領護軍一人  
蒙古兵一千七百人駐守河南令副都統龔圖等率  
見在河南滿州蒙古兵赴荊州此兵到日或遣往彝  
陵或分荊州兵遣往聽大將軍順承郡王等酌量以  
行復令散秩大臣博羅特率蒙古兵六百人赴兗州  
付副都統額赫訥管領其後至蒙古兵七百人尚書  
科爾擴岱率往兗州駐防尋噶爾漢將行

上召入面諭之曰爾所率蒙古兵馬雖不甚肥健今野  
多青草必不誤師行聞前發蒙古兵卒沿途頗肆擾  
掠此行爾其加意嚴禁毋侵奪民物凡行軍駐營俱  
令與滿兵相近勿得遠離

癸卯西寧總兵官王進寶奏復蘭州

官兵圍蘭州賊數路出進寶率官兵分禦力戰  
賊大敗奔入城又造木筏百餘將渡河適進寶  
設兵沿河邀之賊計窮僞總兵趙士昇等於六

月二十六日率偽官兵以城降原任布政使成  
格同筆帖式二人來歸尋

命逮成格等至京師拘禁之後伏誅

甲辰將軍侯張勇等奏復鞏昌

叛賊陳可等竊據鞏昌張勇與巡撫華善圍之  
兩月不下會秦州已克將軍穆占等率兵來會  
賊知勢窮援絕遂降

乙巳提督陳福復定邊

陳福同蒙古貝子達爾扎各台吉郎中額業圖等圍固定邊擒叛將朱龍父子於沙家澗斬之  
定邊遂平

丙午

命諸將分道攻平涼

時王輔臣再疏奏言

皇上念及兵民概從赦宥但如何撫輯

天語未及在事兵將未免瞻顧



上諭曰前頒勅諭官兵百姓一概免罪炳若日星且秦  
州諸處投誠官兵俱已安插得所逆賊王輔臣豈不  
聞知若果傾心投誠當遣伊子王繼禎或標員齎奏  
今不遣來而本內之詞又復驕倨是則借端推托特  
為緩我大兵之計著將軍侯張勇速赴秦州會同大  
將軍貝勒洞鄂等酌量留兵防守秦鞏等處速行進  
取平涼提督陳福速取固原夾攻平涼將軍畢力克  
圖統領官兵速赴將軍阿密達軍前都統海爾圖等

速運紅衣礮赴平涼仍固守隴州斷賊後路

命紀大將軍安親王岳樂等失利罪

岳樂等既克建昌欲平附近餘孽令都統霍特等取石峽村六月二十五日霍特等率兵至石峽時天暑甚賊伏兵從兩山出我軍陳亂奔却署副都統雅賚等戰沒霍特等退保新城岳樂以其狀

聞

上命事平察議

臣謹按初安親王岳樂之既克建昌也

上以時方盛暑

命率大將軍還南昌息兵秣馬俟秋涼候

詔指揮此誠審時度利萬全之勝筭也岳樂宜恪遵成  
命俟時而動乃狃於小利遣兵急攻石峽卒以衝熱致  
人馬疲困損將喪師無不如

睿慮所料者

皇上於萬里之遠瞭若目前而岳樂身在軍中昧於從

事於此益見

聖筭如神非諸將所能仰窺也

戊申

戒諭大將軍貝勒洞鄂等

上諭洞鄂等國家仰承天眷秦州鞏昌蘭州諸處相繼  
收復朕甚嘉悅此皆保寧還旆之兵間闕跋涉戮力  
効命之所致也爾等當時時軫念勞苦方見恤下之

恩爾等將兵在外諳練已久事無大小務期協和持平而行乃克有濟亦知爾等必體朕意不為已利但所慮如此故加告誡將軍張勇勞績甚茂慎勿輕侮致滋嫌隙爾等殫心謀國運籌制勝尚期一德同心早奏蕩平以副朕倚毗至意

已酉調兵守潼關險要

總督哈占奏興安遊擊王可成等於本月初八日復叛總兵官党塞及道官興永朝奔至西安

請移潼關綠旗兵守商州遣臣標綠旗兵守舊縣關及子午太乙二峪分省城滿洲兵守潼關總督鄂善巡撫張德地停赴延安留守省城

上諭先因將軍畢力克圖自延安赴將軍阿密達軍前延安係新復之地安撫殘黎保固疆土事極緊要故遣鄂善等速往今省城見有副都統德業立等兵鄂善等至今未行殊屬不合諭到鄂善等仍著速赴延安興安兵既叛潼關地屬最要應檄駐太原將軍烏

丹分兵潼關同夸蘭大鄂爾博西等協力固守餘悉如哈占請

辛亥

詔增荊州彝陵兵

時大將軍順承郡王勒爾錦奏荊州兵少今雖調副都統龔圖兵援荊州未能即至乞令龔圖移駐南漳更調南漳襄陽滿洲蒙古兵就近來援

上從之既勒爾錦又奏曩陵賊進據江渚火器甚多我  
兵須多用鳥槍居前步騎續進乃可長驅乞調  
發綠旗鳥槍手三千人并就近撥滿洲兵速赴  
軍前

上諭逆賊吳三桂見在松滋大將軍貝勒尚善疏言廖  
祖二賊復以賊七千餘前至松滋則荊州曩陵兵力  
似屬單弱撥岳州兵內每佐領一人速赴荊州着見  
駐兗州護軍統領察哈泰盡率滿洲漢軍兵河南提



督佟徽年選標下鳥槍手三千人並赴荊州聽大將軍順承郡王勒爾錦調度

壬子

命平南親王尚可喜等討叛賊祖澤清

總督金光祖奏總兵官祖澤清以高州叛

上諭將軍尼雅翰見統兵駐廣東前鋒統領舒恕亦率兵前往着平南親王尚可喜將軍尼雅翰總兵金光祖等會商撲勦毋使賊得滋蔓仍嚴飭沿邊將弁固

守地方

癸丑將軍侯張勇請還師防邊

上不允

張勇奏彛情叵測久蓄內犯之心今聞大草灘  
帷幕滿野麾不去實因臣奉

命東征乘虛窺伺乞許臣還駐莊浪以便兼轄

上諭秦州鞏昌蘭州諸處雖次第恢復而底定全陝惟  
在速取平涼逆賊王輔臣一日不滅則秦省百姓一

日不安將軍侯張勇應同大將軍貝勒洞鄂等會商  
速減輔臣定平涼不宜還駐莊浪如彝人果顯然作  
惡擾害邊民即令總兵官孫思克回甘州防禦

平定三逆方畧卷十七

欽定四庫全書

平定三逆方畧卷十八

康熙十四年八月戊午

命大將軍貝勒洞鄂等接應漢中兵

總督哈占奏前聞將軍席卜臣等兵出漢中屯

洋縣隨遣人偵探今據報席卜臣果離漢中但

不知歸自何路臣已啟知大將軍貝勒等一面

檄將軍佛尼勒停止進兵

上諭佛尼勒分兵六百與駐守寶鷄副都統阿爾祐兵  
共為一軍令阿爾祐統轄嚴防棧道諸險要餘兵著  
佛尼勒鄂泰等領至西安如得席卜臣等歸路確信  
即以兵往迎大將軍貝勒洞鄂等見統大兵駐秦省  
作何接應席卜臣等俾全軍而歸與總督哈占等籌  
度以行

已未

詔責總督哈占

哈占奏興安叛兵已與蜀寇合攻陷舊縣關將  
逼西安南山郡盜又分出各口乞

勅大將軍貝勒洞鄂將軍畢力克圖等速發兵應援見  
駐河南副都統龔圖亦乞遣至

上責之曰始王輔臣叛朕以蘭州要地關係三邊令哈  
占發兵鎮守哈占稱西安要地不便發兵致蘭州諸  
處淪陷三邊動搖繼哈占復以西安要地屢疏請兵  
因將荊州大兵陸續調赴西安遂致荊州彝陵兵力

單弱又延安為諸路要衝曾命鄂善周有德等駐守  
哈占又誑奏鄂善等兵少留之西安致延安陷沒哈  
占封疆大臣每當議事不一體籌度但于己身所在  
常欲增兵自衛不求速定地方貽誤匪小今又稱叛  
兵與蜀寇合欲調諸將軍兵悉赴西安是哈占但知  
有西安置他處于度外矣且蜀寇何能便與興安叛  
兵合即至西安不過因諸將齊赴平涼故為聲揚欲  
亂我軍心分我兵勢耳諸將當益急攻平涼勿得稍



緩輔臣未滅西安潼關亦宜增兵勦禦近理藩院郎  
中瑚什巴調蒙古兵赴太原將軍烏丹可率所部兵  
速赴潼關與根特鄂爾博西等協守又蒙古鄂爾多  
斯土默特兵見駐榆林着理藩院員外郎拉篤祐率  
此二部兵速赴西安若鄂爾多斯兵必不可行即留  
與總兵官許占魁統領仍駐榆林

已外遣和碩額駙耿聚忠齎

勅諭耿精忠

勅曰

皇帝勅諭耿精忠爾祖父宣力累朝勲猷茂著俾世襲  
王爵格外加恩逮爾父沒令爾襲封仍鎮閩疆方謂  
爾克紹前猷殫忠報國不意爾反為吳逆狡謀所惑  
蹂躪土地戕害生民朕猶念爾祖父前功不忍遽絕  
將爾在京諸昆弟及所屬人員槩行寬宥給還官職  
恩禮如常今大兵雲集事勢昭然爾自知之朕復念  
爾變亂必有所由或為逼迫所致故復下敕書遣爾

弟聚忠齋至軍前明諭朕意爾若悔罪率衆歸誠當  
復爾王爵仍舊鎮守所屬人員職任如故兵民人等  
照前安插儻能剿除海寇共奏膚功仍優叙賞賚使  
臣周襄緒等為爾羈留或別有故朕不介意朕以誠  
心待天下斷不食言爾毋聽信煽惑之言終懷疑懼  
負朕始終保全至意又

諭兵部曰今遣耿聚忠齋勅赴大將軍康親王傑書軍  
前招撫耿精忠其招撫事宜王與聚忠悉心謀議相

機速行俾閩省生民早離水火爾部即移文知會

辛巳大將軍康王傑書奏官兵克黃巖

將軍貝子傅喇塔遣副都統吉勒塔布等自土  
木嶺進兵是月初四日於半山嶺大敗賊衆乘  
勝進指黃巖縣賊將曾養性等棄營據黃巖拒  
守傅喇塔進兵圍其城養性乘夜突圍走温州  
餘賊開門降遂復黃巖

九月丁亥設湖廣援剿二營

大將軍順承郡王勒爾錦奏賊堅立營壘掘壕  
塹設鹿角挨牌我軍騎兵不能衝突必設綠旗  
精兵七千人造輕箭簾車二百輛礮車一百輛  
熟鐵礮一百具量配兵丁推向賊營填其壕擲  
火藥以燒鹿角挨牌用礮攻擊相賊形勢滿兵  
繼進則逆賊可滅地方可復如允臣所奏乞將  
此七千兵分為援勦二營設二副將統之

上諭大兵與賊相持日久則軍糈日糜民生日困今大

將軍順承郡王勒爾錦等既請設綠旗兵造簾車等  
項應如所請其副將等官聽會同該督酌選才能補  
用着工部精簡交槍二千五百桿遣賢能官員二人  
馳驛速送荊州軍前尋令二營援勦兵俱聽總督蔡  
毓榮統轄

命給將軍席卜臣兵馬匹器械

席卜臣奏本年二月兵糧匱竭臣等取食賊麥  
以至七月又已罄盡計欲保全大兵仍于七月

十七日自漢中出沿路擊賊以八月初六日至  
西安見在官兵俱無馬匹器械難以進取

上諭席卜臣等兵自漢中出沿途擊賊馬匹器械俱盡  
著陝西督撫動正項錢糧買馬人給一匹并整頓器  
械令其鎮守西安

戊子趣大將軍貝勒洞鄂等亟攻平涼

洞鄂奏王輔臣啟

臣

云前疏未奉

聖旨乞頌

赦午門仍遣威望大臣受降竊謂

皇上既屢降

勅諭招撫輔臣乞更

頒諭開示本末

上諭前屢下明詔王輔臣果悔罪來降當宥其前罪頃

秦州諸處官兵來降悉赦其罪輔臣安有不知且先

遣祝表正尚未歸豈宜復遣大臣彼乞降詐也特緩

我師為苟延日月計耳爾等急宜攻取平涼若輔臣



即投誠勿加誅戮再行請旨慎毋因其詐降以悞進  
取之機若不即投誠其以朕屢降恩赦而彼不悔禍  
之意布告官吏軍民使知所以不得不舉兵加誅之  
故

臣謹按先是

上欲速拯兵民之困屢降

德音招王輔臣而輔臣觀望兩端不即歸正至是復詭  
計乞降冀緩我師以望逆黨救援洞鄂不察

賊情遽為代請賴

皇上聖明察其狙詐欲以兵威大創之因令洞鄂急攻  
平涼勿因其偽降而誤進取之機乃洞鄂憚  
于攻取依違如故

皇上隨遣大將軍圖海督率將士薄城一戰而輔臣果  
震怖窮蹙束手來歸

宸謨料敵神明如此逆賊亦安所施其狡計哉

丁酉

命理藩院郎中瑚什巴以蒙古兵駐太原

瑚什巴等奏簡蒙古四子烏喇特茂明安三部落兵一千進殺虎口於八月三十日至太原

上即命瑚什巴同蒙古領兵都統管轄鎮守太原

庚子

諭大將軍順承郡王勒爾錦詳奏彞陵情形

先是防守彞陵貝子準達因彞陵兵單請兵于勒爾錦遂發滿洲蒙古綠旗兵一千八百給貝

勒察尼靖寇將軍印率赴彞陵月餘並無音問  
上諭兵部曰貝勒察尼往彞陵月餘曾否與賊戰即戰  
勝負若何賊情若何爾部其移文順承郡王令其速  
奏後順承郡王勒爾錦奏曰貝勒察尼於八月十九

日至彞陵與

臣

書云彞陵城外東北有鎮荆山

賊立營掘壕立橋堅壁以守難於進攻近偵知  
我兵日增隄備益嚴但思寇糧取給湖南必由  
長江轉運若斷此糧道別無轉運之所賊必饑

因今惟俟兵卒與船耳臣隨將荊州所有划子  
船一百四十隻於本月二十五日發往提督佟  
徽年兵亦於十月初一日遣行

命大將軍安親王岳樂速取長沙大將軍簡親王喇布  
往鎮江西

上趣岳樂進取長沙岳樂奏俟內大臣希爾根軍自饒  
州至創擊石硤逆賊殲貴溪諸寇撥兵守要地  
得便即進長沙

上諭之曰賊渠三桂也今不早滅雖江西福建之賊盡  
除於事奚益安親王岳樂其量撥官兵固守江西乘  
冬月速取長沙大兵進長沙後諸賊乘間竊發恐江  
西復擾其令簡親王喇布率江南兵二千赴江西以  
內大臣希爾根為副將軍與簡親王協同鎮守副都  
統額赫訥率在兗州盛京烏拉兵一千速赴江寧至  
即以兵付將軍哈爾噶齊令駐守江寧而身從簡親  
王往江西叅贊軍務布顏赴兗州用鎮東將軍印管

轄蒙古兵尼滿為署副都統赴江寧叅贊哈爾噶齊  
軍務署副都統額思赫赴池州

壬寅

詔責大將軍貝勒洞鄂等

洞鄂奏王輔臣報書言彼所遣官王起鳳赴省  
已逾兩月尚未遣還故士卒皆懷疑畏乞

皇上再赦輔臣併所屬官兵之罪仍令駐守平涼遣王  
起鳳還則彼無不傾心來歸今大兵僅足圍平

涼不能堅密儻賊勢窮突圍難保輔臣不脫去

也疏入

上責之曰逆賊王輔臣誘緩大兵其計顯然貝勒洞鄂不速率兵勦滅反請寬宥其罪若免輔臣罪仍令駐守平涼假使川賊侵秦州興安賊逼西安我兵勢必分路進剿當此之時貝勒洞鄂能必其不乘隙復叛耶今大兵雲集已困孤城乃云賊勢窮突圍難保其不脫去蓋恐王輔臣他日潰遁故設此辭預為地耳



若輔臣果難圍困剿滅何以貝勒洞鄂獨言之而貝  
子公叅贊大臣不言是獨貝勒洞鄂一意為主招降  
也貝子公叅贊大臣皆朕所倚任若灼見城不可圍  
寇不可滅何以不據實陳奏凡事惟貝勒洞鄂退縮  
之意是從至今不攻取城池尚復何待行軍重事豈  
獨付之貝勒一人耶貝勒貝子公叅贊大臣等速行  
圍城務期勦滅逆賊王起鳳著遣還平涼

平定三逆方畧卷十八

欽定四庫全書

平定三逆方畧卷十九

康熙十四年十月庚申

命將軍噶爾漢自河南帥師赴襄陽

大將軍順承郡王勒爾錦奏逆賊楊來嘉洪福  
謝四等五路齊出屯均州諸處荊州兵少不能  
分遣檄河南鎮安將軍噶爾漢率所部兵赴襄  
陽

上諭河南當秦楚之衝噶爾漢之兵未可全調留護軍  
二百蒙古兵六百委兩翼護軍叅領各一員統之仍  
駐河南府其餘滿洲蒙古兵噶爾漢速行帥赴襄陽  
勅陝西諸將固守要地

總督哈占奏偽總兵魏姓者率衆自洋縣犯黑  
水峪豐峪口及西洛口諸處偽將軍王屏藩出  
漢中抵畧陽譚洪出西河吳之茂率偽總兵五  
人營於單家河同犯秦州

上諭逆賊聲言出犯各口意在分我兵力乘間而動耳  
諸將其各守要地悉力勦禦毋使賊勢蔓延

癸亥調西安兵援大峪口

總督哈占奏興安叛賊渡江將出大峪口

上諭大峪口去西安最近若調兵遠地慮稽時日總督  
哈占將軍席卜臣等於漢中還兵內簡精銳者遣守  
大峪口西安要地宜增兵防禦以大同察哈爾兵三  
人太原滿洲兵三百人調赴潼關此兵既抵關將軍

烏丹即遣所部兵五百人速赴西安未幾烏丹哈占等奏賊犯商州舊縣關諸處已遣副都統德業立率兵五百人往援商州兵少賊勢甚盛潼關商州賊皆有路可通見在危急

上諭將軍噶爾漢所留河南護軍二百蒙古兵六百馳赴潼關聽將軍烏丹等調遣復於京師發每佐領甲兵一人令叅領瑚什巴額勒布統之往駐河南府

甲子

詔責大將軍貝勒尚書

尚善奏長沙岳州如唇齒相依若偏攻一隅未能猝拔必長岳兼攻庶可破賊今安親王進攻長沙岳州亦宜協力規取但兵力尚少乞添發河南山東兵每佐領四人以資進討

上諭前貝勒尚善奏岳州逆賊浚壕立橋甚固不能攻取故將岳州兵分遣荊州諸處並非罷岳州之攻也頃尚善等報岳州賊黨吳三桂已檄往彝陵今計我

兵之在岳州武昌者每佐領約有九人又有綠旗官兵我兵雖減於舊而賊勢亦分若以之取岳州未為不足尚善又請發河南山東兵不合速移會尚善作何攻取岳州即酌量以行

壬申調大同諸處兵赴固原

提督陳福奏九月二十三日平涼賊奄至固原賊亦自城內突出齊犯我軍遣副將太必圖率兵擊之方與賊戰中衛副將賈從哲忽退遊擊



張元經亦率兵走於是衆軍驚擾太必圖遂沒  
於陣臣與前副將恰塔等於二十八日回至靈

州

上命即於軍中斬從哲元經以徇又

諭曰固原賊衆城守甚堅今川賊又入平涼應速遣兵  
勦禦鄂爾多斯兵已遣還不宜復調調駐大同兵及  
神未歸化城兵令副都統恰塔員外郎拉篤祐領之  
或由延安或由定遠速赴固原此兵既到陳福即率

本標兵或先定固原或會大將軍貝勒先取平涼與  
恰塔拉篤祐酌行大同兵既往固原令郎中瑚什巴  
分太原蒙古兵五百人赴大同駐守

甲戌授大將軍貝勒洞鄂等攻取平涼方畧

上諭兵部頃大將軍貝勒洞鄂總督哈占等報興安反  
賊犯商州大峪口川賊譚洪救平涼皆因王輔臣未  
滅我兵俱集平涼故諸賊乘隙侵犯欲分吾兵力以  
援輔臣今洞鄂等官兵至平涼日久自宜急圖攻取

設使平涼未破而四川之賊來援興安之賊又至大  
兵往來路阻後雖恢復平涼亦復何益若平涼破輔  
臣滅則賊應援之念絕而窺伺商州之計亦沮全陝  
可無虞矣平涼南山俯視城中甚悉若乘南山以紅  
衣大礮攻之城中賊衆自不能支洞鄂等速奪南山  
則平涼可克未幾哈占又秦慶陽賊業已就撫臣遣  
固原遊擊屠遵義率兵守之未至而逆賊王輔  
臣已遣其黨周養民圍慶陽伏兵斷路我兵不

能救慶陽復陷賊又犯皂社皂社與涇州常武邠州接壤為平京大兵後路臣已遣固原總兵官朱衣路赴救於是

上復諭議政王等曰貝勒洞鄂駐平涼日久兵力不少但圖自便憚於攻戰以致逆賊王輔臣分兵救固原今又襲慶陽洞鄂及叅贊大臣從未赴敵任賊四出若罔聞知平涼賊勢既分又不乘虛攻取伊等在平涼所司何事及今不取更待何日耶若仍頓師不進

必致我兵漸疲糧儲漸耗賊益窺伺蹂躪地方貽害不小洞鄂等其公同籌畫剿除逆賊

辛巳遣署副都統穆成額叅贊將軍覺羅舒恕軍事

舒恕奏言軍務最重須叅贊得人右翼中無可委署副都統議軍事者協守吉安署副都統穆成額乃右翼人乞遣發臣軍叅贊軍事

上諭廣東軍事繁多叅贊不可乏人都統副都統等官

在江西者頗多穆成額即赴舒恕軍前叅其軍事大將軍簡親王別委大臣代守吉安

十一月丙戌朔

命將軍侯張勇固守鞏昌諸路

先是

上諭張勇曰陝西重地凡平定地方掃除賊寇惟爾是賴今大將軍貝勒洞鄂雖攻圍平涼而逆賊王輔臣嬰城死守恐稽時日又川賊已過昌寧驛來援平涼

我兵若不速滅輔臣則陝西不能即定爾量留官兵  
守鞏昌親自率兵赴洞鄂軍前協力進取平涼若鞏  
昌必不可離多發標兵往平原以助攻戰并宜設策  
截川賊來援之路於是勇言逆賊吳之茂率衆進屯

單家河諸處

臣

若赴平涼恐賊乘虛直犯

臣斷

不可遠離鞏昌且官軍皆已分遣

臣

兵單實無

可發

上下議政王貝勒大臣集議議政王等奏言鞏昌所關

亦重應如張勇所奏令固守鞏昌秦州諸處相  
機勦禦

上從之

丁亥罷都統海爾圖叅贊

海爾圖以運礮屯夫俱逃請發槍手步軍四百  
人綿甲八百人防護又以礮手熟練者少請於  
八旗滿洲漢軍內擇素習者遣發赴軍前大將  
軍貝勒洞鄂以



聞

上責之曰貝勒洞鄂等帥師抵平涼為日已久不速滅賊平定地方及命礮攻平涼海爾圖又托故具啟遷延時日洞鄂等並不議其可否但據啟以聞殊為不合前送紅衣礮撥漢軍每佐領二人海爾圖謂不足又添派一人及海爾圖去時藉口沿途養馬不即速行至關山又請兵二千欲靖賊寇復如所請添發而究不能開通關山今令用紅衣礮急取平涼海爾圖

復請自京師發搶手綿甲駢延時日有誤軍機殊負  
任使著解叅贊之任洞鄂等仍遵前旨速定平涼

丁酉大將軍簡親王喇布請益兵

上不許

喇布奏安親王已分每佐領甲兵十人進征湖  
南江西留每佐領下人分駐建昌諸處省城所  
餘止每佐領二人今欲勦滅諸路賊寇而兵難  
調集欲分守而兵又不足乞將在江寧烏喇及

盛京兵發來江西

上諭江南要地烏喇盛京兵不宜調發江西見有每佐  
領甲兵十人又南昌饒州建昌廣信吉安諸處皆添  
設綠旗官兵已足調遣大將軍酌量緩急有可緩之  
處調其官兵以資戰守

庚子

命提督趙國祚等隨大將軍安親王岳樂進剿

岳樂奏逆賊吳三桂聞

臣

進取長沙必固守要

害非綠旗無以涉險阻非紅衣礮不能破營壘  
提督趙國祚久在行間熟練火器兼有綠旗兵  
三千屯墾都督陳平有兵二千乞俱令隨臣進  
討其廣東送來紅衣礮甚重路險難致西洋礮  
輕利乞發二十具為攻勦之用

上諭勦滅逆賊平定湖南皆於安親王是賴練習宿將  
及精兵火器俱不可闕提督趙國祚都督陳平并所  
屬官兵悉如安親王所請南懷人所造火礮可遣官

兵準數送至江西轉運安親王軍前王不必待破到  
始行亟由吉安或袁州進發

壬寅

勅大將軍簡親王喇布分兵赴廣東

總督金光祖奏叛鎮馬雄同滇賊王宏勲等至

高州高雷廉叛兵合計約有十萬

臣

率兵深入

高州恐逆賊孫延齡乘隙犯梧州平南親王尚可

喜又無兵可調乞添發大兵前來應援

上諭逆賊率衆來犯廣東不可不速遣大兵大將軍簡親王於留守江西兵內即選擇精銳每佐領二人命才能夸蘭大率之速赴廣東聽平南親王尚可喜將軍舒恕總督金光祖商酌調遣此兵仍著舒恕統轄江西兵既發往廣東山東兗州蒙古兵六百人令署副都統科爾擴岱統之即赴江寧科爾擴岱既到江寧江寧所有烏喇盛京兵一千令署副都統尼滿雅秦揚古岱統之即赴江西更發禁耳每佐領兵二人

其半赴江寧同蒙古兵六百人俱聽將軍哈爾噶齊  
統轄其半赴山東同原駐蒙古兵聽將軍布顏統轄

平定三逆方畧卷十九



欽定四庫全書

平定三逆方畧卷二十

康熙十四年十二月戊午

勅大將軍貝勒洞鄂斷賊糧道

洞鄂奏臣等已克平涼第一關廂去城三里許

對南山屯營以礮攻城欲向前薄城溝深城險  
難以下壘故城不能速下

上諭逆賊久踞平涼皆因有糧可恃若斷其餉道則賊

金史卷之八  
卷二十  
自窮平涼西北通固原要路大將軍貝勒等宜速斷  
截以困斃之

庚申

命解左都御史多諾侍郎勒布任革候補侍郎覺羅阿  
範職

上諭大學士圖海等前遣多諾勒布總理湖廣大兵糧  
餉節省浮冒招集殘黎責任綦重伊等宜仰副朕責  
成之意實心料理竣事而還乃未著有成效希圖規

避奏請回京順承郡王勒爾錦等屢奏多諾等任極  
重大不宜發回前欲遣勒布往荊州貝勒尚善亦奏  
糧餉重務不宜發往屢奏甚明今乃忽稱無事伊等  
竟自回京是何故也阿範叅贊簡親王軍務不思効  
力託言有疾來京俱屬越例著議政王貝勒大臣察  
議議政王等議革多諾左都御史佐領及其世職革  
勒布侍郎佐領勒爾錦尚善等前後奏請舛錯  
事平議罪阿範革候補侍郎及其世職仍發江

西軍前充伍奏上

上命留多諾佐領及伊父世職留勒布佐領餘悉如王  
等議

壬戌

勅荆岳大將軍等分兵夾攻長沙

上諭荆岳大將軍等曰今大將軍安親王由江西進取  
長沙爾等應發兵夾勦前者荊州添設綠旗兵及烏  
鎗兵甚多貝勒察尼又帥兵赴彝陵已數月矣尚未

奏捷順承郡王勒爾錦等或分見在荊州兵或調地  
方可緩之兵速發長沙倘彞陵賊未能即破察尼等  
應量留官兵於彞陵遣餘兵與荊州兵合或由雲溪  
驛或由別路酌量議定并量及安親王將抵長沙之  
期彼此關會協力齊進斷賊糧道夾攻長沙貝勒尚  
善亦分遣官兵與荊州彞陵兵同往尚善等仍作攻  
取岳州之勢移兵逼之如機有可取即取岳州爾等  
帥大兵駐荊岳將及二載糧費師老曾未得尺寸之

地坐失事機罪不勝數今安親王進攻長沙若不發兵夾勦俾賊偵知荆岳按兵不動死守長沙要路則爾等貽悞之罪更大矣其遣發之兵誰可統率著公議遣往無分彼此同心協濟務期有裨國事

授大將軍安親王岳樂進兵方畧

岳樂奏偽總兵張存遣使來言闡逆軍餉匱乏軍士逃亡恣意剝削百姓怨讟存有兵八千人屯於順昌不聽耿逆調遣又偽總兵羅元生等

統兵自守其地邵武總兵彭世勲雖降逆而按  
兵不動此皆耿逆之內患也若大兵自江西進  
閩伊等即為內應但臣見赴長沙尅期進發仰  
祈

睿鑒詳度無失事機疏聞

上諭招徠逆賊克取福建令大將軍簡親王副將軍希  
爾根將軍額楚總督董衛國等相機以行至於進攻  
長沙勦滅吳逆惟王是賴但恐逆賊覘知我兵進取

長沙固守袁吉阻我兵行至或揚言取道別路出其  
不意或合兵前進或兵分數道在王必有定見其悉  
心籌畫萬全務速行之

癸酉平南親王尚可喜奏請大將軍安親王岳樂  
移師入粵

上不允

可喜奏逆賊劉進忠勾引鄭錦入潮祖澤清勾  
引馬雄至高粵東十郡竟失其四今將軍舒恕



總督金光祖復退回肇慶事勢危急較昔為甚  
聞安親王由袁州進攻長沙恐時當春水汎濫  
且吳逆全力集常澧其守禦必堅請以公沃赫  
之兵仍駐袁州令安親王赴廣東撲勦賊寇

上諭吳三桂未滅故諸賊得以猖狂今安親王進取湖  
南則粵東之勢自緩若由粵東進兵則道路迂迴稽  
延時日前以粵東危急已命大將軍簡親王發每佐  
領甲兵二人馳赴應援此兵到日平南親王與將軍

舒恕等公同詳議固守疆圉剪除逆賊又

諭簡親王喇布曰前以粵東告急命爾發每佐領甲兵  
二人速援乃至今尚未遣發殊誤事機今再撥每佐  
領護軍一人并前所發兵或副都統額赫訥或署副  
都統宗室巴爾堪令一人為將軍統之速赴廣東毋  
得仍前遲滯致悞軍機

乙亥

詔責大將軍順承郡王勒爾錦

勒爾錦等奏

臣

等身在地方目擊逆賊情形今

若不速行渡江前進必致餉匱師老馬力減損  
細籌之若得滿兵每佐領十人則戰守俱足今  
調集各路兵合在荆之兵每佐領得四人有半  
乞再發禁旅每佐領五人便可渡江破賊

上責之曰方吳三桂之初叛也即命大將軍順承郡王  
勒爾錦等率精兵往討賊來甚速其力必疲勒爾錦  
等不乘此時擊之但頓兵荊州故賊得以其暇據有

湖南厥後大兵齊集又不尅期渡江賊於是得固守  
要害犯我彝陵揆厥所由實由勒爾錦及叅贊巴爾  
布伊勒都齊碩岱等耽延時日不急討賊故逆賊滋  
蔓耿精忠孫延齡相繼叛亂前因欲渡江擊賊請發  
官兵已添發滿洲蒙古兵數千綠旗兵一萬而究未  
得湖南尺寸地今復請兵豈果欲速滅賊寇亦不過  
冀免逗留之罪耳巴爾布伊勒都齊碩岱等著俱解叅  
贊留任効力贖罪

丁丑


命提督陳福速取固原

先是

上諭議政王等曰秦省要區叛賊王輔臣亟宜勦滅其  
令提督陳福整頓標兵或併力尅取固原或會同大  
將軍貝勒洞鄂等進攻平涼同副都統恰塔商酌以  
行至是福奏固原有賊萬餘若舍此竟趨平涼恐固  
原賊出斷我糧道應俟賊勢少衰進逼固原量

留官兵圍困其城臣乃率兵赴平涼方無後慮  
上諭陳福身在地方熟悉賊形可如所請速取固原以

遏賊勢



平定三逆方畧卷二十

欽定四庫全書

史部

平定三逆方略卷二十一

一至五

詳校官編修臣曹振鏞

編修臣裴謙覆勘

總校官候補中書臣潘有為

校對官中書臣李斯咏

謄錄監生臣邵延曾

欽定四庫全書

平定三逆方略卷二十一

康熙十五年正月丁亥

命貴州提督趙賴募兵

總督董衛國奏江西提督趙國祚率標下官兵

三千隨安親王進取長沙綠旗官兵遂至缺額

江省伏莽未靖防守之兵不宜少減

上命見駐九江貴州提督趙賴就近募兵三千暫令統



轄卽以此兵分屬將弁李廷獻等八人以時訓練

命將軍侯張勇等撫寧夏叛兵

時提督陳福統兵駐惠安堡欲會合土默特兵規取固原十四年十二月二十二日夜提督營兵猝變福遇害員外郎拉篤祐等報至

上諭寧夏三邊要地所關綦重將軍侯張勇巡撫華善相與協議如鞏昌無虞分一人赴寧夏慰諭官軍其

副都統恰塔兵及員外郎拉篤祐所領土默特兵可  
駐防靈州定邊諸處至陳福被害之由總督哈占巡  
撫杭愛察實以聞尋張勇奏寧夏兵變民心驚惶又  
恐逆賊王輔臣出犯深屬可憂再四籌度必臣  
親往始克有濟擬於本月十二日親統兵前赴  
寧夏撫輯既定如鞏昌秦州有事則仍還鞏昌  
無事即相度機宜進勦平涼固原

命西寧總兵官王進寶為陝西提督

上諭兵部陳福已為亂兵所害秦省提督職任重大宜得賢能以資彈壓西寧總兵官王進寶忠誠克殫勞績素著著授為陝西提督暫駐秦州仍令兼理西寧總兵官事其寧夏總兵官員缺聽將軍侯張勇巡撫華善遴選題補

辛卯

敕大將軍貝勒洞鄂等速取平涼

時寧夏兵變

上諭議政王等秦省不能即定皆由平涼未下王輔臣未滅之故目前攻取平涼最為急務大將軍貝勒洞鄂與將軍侯張勇總督哈占等宜相機公議速取平涼斷賊餉道綏靖地方

丙申

詔責大將軍順承郡王勒爾錦

先是勒爾錦奏請益兵

詔旨詰責至是具疏首罪乞付部議

上復切責之曰勒爾錦統領大兵進剿逆賊二載有餘未獲尺土以致師老餉匱坐失機宜今不直陳其罪又巧飾具奏殊為不合應即處分但現在進兵俟旋師日嚴加議罪

申飭大將軍簡親王喇布

喇布奏署副都統尼滿雅奏率兵自江寧至即遣往與建昌兵更替若俟建昌兵到始令廣信撤來之兵與之同發恐稽時日故令夸蘭大伊

都堪色赫率廣信兵每佐領一人於本月初三日自南昌先赴廣東其建昌兵到即令副都統額赫訥率往

上諭粵東需兵甚急故前撥江西大兵每佐領二人尋復撥每佐領一人屢趣速赴廣東乃至今尚未全發殊悞軍機自後一切調度事宜務遵旨速行

命天津總兵官趙良棟為寧夏提督涿州參將陳奇為天津總兵官

先是

上諭兵部叢者將軍侯張勇請調天津總兵官趙良棟  
赴秦其時因秦地尚屬可緩津門地當海口故未即  
調遣茲寧夏有事應調與否令張勇密行具奏至是  
勇奏良棟向隨臣征勦著有功績精明歷練才  
畧過人臣知之最深故前疏請調補寧夏總兵  
官今若令良棟統理寧鎮析

敕由邊路兼程速赴

上諭寧夏要地宜重其事任總兵員缺著改為提督即以趙良棟陞補令其兼程速赴提督陳福為國捐軀忠誠顯著福弟涿州叅將陳奇即著超補天津總兵官

戊申

敕大將軍貝勒洞鄂等調兵赴秦隴

上諭議政王等今將軍侯張勇請赴寧夏秦州諸處兵力甚單其令大將軍貝勒洞鄂將軍席卜臣總督哈



占等相地方緩急西安近地兵有可撤者速行撤回  
發往秦隴聽將軍佛尼勒提督王進寶等酌量調遣  
以裨戰守

庚戌

命巡撫佟國禎赴贛州

先是總督董衛國疏請親統官兵進剿餘干諸  
處逆賊留撫臣佟國禎於南昌

上可其奏至是大將軍簡親王喇布奏稱省城兵力單

弱總督不便領兵他出贛州為江西門戶投誠將士雜處彈壓需人請留總督董衛國於省會令巡撫佟國禎速赴贛州

上從之

二月癸丑

命大將軍平南親王尚之孝還廣州

平南親王尚可喜奏言

臣病日劇而寇在門庭

臣子之孝又統兵在潮臣軀恐有不測則粵中

危在旦夕請遣威望大臣星馳抵粵以資彈壓  
上諭王累世勲舊殊猷重望久鎮巖疆勞績懋著自逆  
賊變亂以來王篤守忠誠殫抒籌畧訓練士卒保障  
地方勦禦賊寇朕所倚毗今覽王奏稱年力漸衰身  
嬰疾疴請遣大臣經理廣東事務具見王實心為國  
計慮周詳朕與王情猶父子覽疏未竟心為惻然但  
王屬官兵駐鎮日久地方賴以寧謐措置咸宜軍民  
警服若別遣大臣前往恐該省之事一時未能周知

所關匪細王可於諸子中擇才畧素優者遣赴潮州  
整理軍務大將軍平南親王尚之孝回廣州侍王左  
右扞衛封守王其加意調護期於平復以慰朕眷念  
至意

戊午

命副都統額赫訥赴廣東

平南親王尚可喜奏逆賊馬雄董重民等乘高  
雷叛變益肆猖獗滿漢大兵退駐肇慶湖逆劉

進忠引海寇入犯提督及平南大將軍等又退  
至惠州請大兵兼程赴援

上諭頃據簡親王報以每佐領護軍一人驍騎一人付  
副都統額赫訥於正月初十日前赴廣東今粵中告  
急可令額赫訥等倍道速進

庚申

詔廣東大小將校各加一級

上諭兵部粵東用兵二載將士勞苦自總兵官以下把

總以上俱各加一級仍領本職如故

命副都統恰塔等守寧夏

先是提督陳福遇害

上令副都統恰塔員外郎拉篤祐都統古魯副將賚圖等駐守靈州定邊諸處至是恰塔等奏若移定邊靈州有黃河之隔寧夏有事猝難策應臣等已率部兵屯黃河對岸以扼兩路要害

上因命恰塔等協守寧夏以安軍民之心尋又

諭兵部曰提督趙良棟今兼程赴寧夏軍機緊要良棟  
抵寧夏日一切軍務機宜恰塔拉篤祐等俱與良棟  
共議而行

壬戌

命都統大學士圖海為撫遠大將軍帥師赴陝西

上諭議政王等曰大將軍貝勒洞鄂等屯兵平涼曠日  
持久賊寇尚未勦滅城池尚未恢復夫秦省不能即  
定川賊尚在窺伺者皆由王輔臣未滅平涼未下故

也其以都統大學士圖海為撫遠大將軍率每佐領  
護軍二人亟赴陝西總轄全省滿漢大兵斷賊餉道  
勦滅平固逆孽以靖地方大將軍抵平涼時盡收各  
將軍敕印遇有分遣酌量給付貝勒洞鄂以下悉聽  
大將軍節制

甲子

命將軍侯張勇還鞏昌

時勇已赴寧夏會巡撫華善奏逆賊吳之茂自



四川出犯踰風水嶺逼鞏昌

上乃命張勇速還鞏昌勦禦

乙丑

命都統畢力克圖率兵赴寧夏

上諭議政王等見駐寧夏滿洲蒙古大兵無人統轄其  
仍授都統畢力克圖平逆將軍印以所部前鋒赴寧  
夏統轄滿洲蒙古官兵鎮守地方俟草青時酌調鄂  
爾多斯兵協取平固

戊辰

詔增平涼兵

時大將軍貝勒洞鄂奏頃分遣官兵令副都統希福往守隴州諸處平涼兵力頗單

上命增派每佐領驍騎一人付大將軍圖海率往抵河南日大將軍即統河南兵赴平涼而以此兵付統領兩翼叅領胡什巴額勒布駐守河南尋又令大將軍圖海選河南撫標下鳥槍手二百人

并察西安物故之兵所遺廝役俱令披甲率赴  
平涼

命郎中額業圖諭鄂爾多斯王貝勒等

總督哈占奏言寧夏與鄂爾多斯接壤今乘內  
地有事蒙古入邊侵掠寧花塞平羌等堡

上命署理藩院郎中額業圖為副都統馳驛赴鄂爾多  
斯以剗掠情狀諭其王貝勒等令之嚴禁毋擾  
內地仍令鄂爾多斯整理甲兵以俟調遣

庚午

命將軍哈爾噶齊帥師赴廣東

平南親王尚可喜奏賊犯惠州肇慶諸處省城  
危急

上諭粵省要地苟有疏失為賊利不小頃雖調遣江西  
兵尚恐單薄今以克州每佐領驍騎兵一人蒙古兵  
六百及駐防徽州池州滿洲蒙古兵七百令將軍哈  
爾噶齊統領馳赴粵東如有稽緩坐以失誤軍機之

罪其哈爾噶齊所用平寇將軍印留付署副都統科爾擴岱鎮守江南徽州池州餘兵七百人恐難捍禦或令見駐安慶提督移鎮池州或撥蘇州駐防兵五百往駐徽池將軍總督等公同酌議調遣至山東兗州戍防不可無兵大將軍圖海所統兵內分每佐領一人往山東駐守俟盛京兵到酌發圖海軍前

辛未趣大將軍康親王傑書等進兵

上諭兵部前命康親王傑書為大將軍平定閩中王奏

先滅浙寇再進福建已允其請後授貝子傅喇塔為將軍進取黃巖乃偕稱修橋俟船輾轉遷延屢下詔嚴趣始取黃巖進温州其時曾言紅衣礮至即取温州今據王所報稱礮已俱集而温州之即得與否初未奏及師行猶豫若此何時始得入閩邪王貝子統率大兵駐浙江曠日持久致師老餉匱今温州若刻日可下則速行進取儻不能即克宜分兵留守王親統大兵為先取福建之計如仙霞嶺路險難進或由

分水關入或別從間道當酌量速行福建一定則江西之兵可以全力辦賊而吳逆亦可指日定矣王貝子屬朕懿親大小將弁皆素所信任當各効心膂奮力前驅如仍瞻顧不前則師益老餉益匱貽誤大事莫此為甚王等其勉副委任乘此事機速議進止以聞

甲戌趣大將軍貝勒尚善等進兵

上諭兵部貝勒尚善等統率大兵往駐岳州將及二載並未移師前進作攻城破賊之勢因循坐守馴至師

老財匱今因大將軍安親王由袁州進取長沙湖南  
逆賊遂欲分我兵勢來犯江廣前據報岳州逆賊往  
援彝陵諸處則岳州賊勢已分貝勒尚善貝子彰泰  
公蘭布皆朕懿親委以重任都統珠滿護軍統領額  
司泰副都統路什阿晉泰前鋒統領噶爾弼等皆以  
勝任簡用巡撫韓世琦提督桑額亦以才能著稱界  
以封疆重任今岳州滿洲蒙古之兵為數不少桑額  
標下士卒頗衆今湖南賊勢既分即宜整理甲兵為



進取岳州之勢可取則取如或不可即覘賊虛實或  
發兵聲言由岳州進攻長沙遇賊即邀擊以撓之俾  
不能分援他所則江西廣東寇警少息而大將軍安  
親王規復萍鄉以圖長沙亦易為力矣尚善等初無  
剿滅賊寇恢復疆土以副朕委任之心未嘗偵察情  
形期赴機會敵兵分遣置若罔聞止知畫地自守圖  
保身軀不能少進尺寸如謂逆賊深浚濠塹多用火  
器以傷我軍儻值大雨之時其火器亦尚可用耶總

之不實心効力致賊得任意應援貽誤大事良非細故如此因仍逆賊何日得滅地方何日得平尚善等以文到日即作攻取岳州發兵長沙之勢以牽制逆賊儻有機可乘速行進取如有未便仍許奏聞

命將軍哈爾噶齊帥師援吉安

先是廣東告急已遣哈爾噶齊統江寧兵赴援至是賊將高大節等乘大將軍安親王岳樂進取袁州萍鄉之隙擁衆數萬圍吉安大將軍簡

親王喇布以聞

上諭吉安為廣東要路今既被圍應速發兵救援駐江  
寧將軍哈爾噶齊於率赴廣東兵內選其半馳往南  
昌與大將軍簡親王副將軍希爾根等共議即于所  
部兵及南昌兵內酌量派出率赴吉安速破賊寇以  
通入粵之路粵道既通哈爾噶齊仍率兵赴廣東其  
半留江寧之兵付賢能夸蘭大侯兗州兵到即令肅  
往并移文大將軍安親王俾知吉安情形以便隨機

策應

乙亥

詔加鄂爾多斯台吉等級

上諭理藩院鄂爾多斯台吉等率兵入邊宣力戎行殊  
為可嘉其見在軍前者各加一級

丙子

申諭陝西諸將領

上諭陝西諸將領曰我國家自創業以來克敵攻城必

主帥奮勇先登軍士効死戮力故能速建膚功今聞爾等凡與敵遇率皆乘間伺隙觀望不前但令士卒前驅衝突其督撫亦多坐失事機勞師匱餉職此之故因命都統大學士圖海為撫遠大將軍如平涼總制諸軍爾等痛改前愆殫心圖効若仍蹈往轍一經大將軍指名劾叅必置重典至兵士行間勞苦朕已悉知亦宜體養之恩益奮同讎之勇果建功勲不吝爵賞爾等勉之

發帑金賞平涼軍士

上諭平涼滿漢軍士曰爾等比年所在征戰為國効命  
朕悉聞知今圍攻平涼屢次衝突奮勇殺賊嚴冬掘  
壕遠道樵採備歷艱苦朕心深為憫惻茲命撫遠大  
將軍都統大學士圖海統率禁旅征討逆賊雖目前  
國用殷繁念爾等戮力行勦勤勞已久特發內帑白  
金五萬兩齎至軍前普加恩賜以昭朕優恤軍士之  
意爾等一乃心力益勵忠義速翦羣兇朕不吝復加

優賞爾等勉之

臣謹案用兵之道必統兵將帥能身先士卒乃可使三軍用命我

朝創業以來開疆拓土戰勝攻取莫不皆然時陝西諸將弁每與賊遇往往顧望不前惟遣士卒先驅令之攻突

皇上深知其故乃下

詔旨開諭訓飭既又念兵士征行日久艱苦備嘗特發

帑金加之賞賚自是將士感恩畏法咸矢死  
圖報各思一戰後大將軍圖海奉

命討賊衆皆奮臂爭先大創賊衆收復平涼是皆由我  
皇上洞悉軍事德威並用故能勵軍心作敵愾立奏捷  
功也

命大將軍簡親王喇布等亟取吉安

時總督董衛國報吉安被陷

上諭吉安最關要害大將軍簡親王喇布副將軍希爾



根總督董衛國等速議恢復以通入粵之路將軍哈爾噶齊率師星馳赴江西亦與簡親王等協力攻勦尋簡親王喇布奏欲暫棄廣信撤還將軍額楚所率兵併調樂平兵勦吉安賊俟吉安恢復後再為規取廣信之計

上諭廣信兵既撤還饒州恐有他虞簡親王等其議所以固守饒州勿致有失

戊寅大將軍圖海帥師之陝西

己卯總督董衛國奏大兵復萍鄉

大將軍安親王岳樂統領大兵進剿逆賊於是  
月十一日抵萍鄉相視形勢分兵四隊十五日  
我兵前進分路並擊大敗賊衆破其十二寨斬  
首萬餘級復萍鄉縣偽將軍夏國相棄印走董  
衛國以捷聞

上諭安親王摧賊堅城賊已破膽宜即乘勝直取湖南  
但我兵進取湖南逆賊吳三桂或撤所在賊兵齊赴

卷二十一  
長沙亦未可知其在荆岳大將軍王貝勒等亦當部  
勒兵馬亟行偵探乘機進剿

辛巳

命總督哈占等運餉秦州

時哈占奏秦州大軍餉道為賊所阻

上命哈占同巡撫杭愛速遣賢能官絡繹運餉至秦州

軍前毋致愆悞

命將軍席卜臣等遣兵守關山

大將軍貝勒洞鄂奏稱聞逆賊聲言將斷關山  
道臣欲發兵往守但見兵無幾勢難分遣至於  
鞏昌雖有副都統翁愛率兵前赴而賊日益近  
勢有可虞

上諭關山險要之地將軍席卜臣總督哈占宜相地方  
緩急調各隘官兵守關山將軍侯張勇兼程速還同  
將軍佛尼勒等勦出犯秦鞏之賊自後一切軍機大  
將軍貝勒洞鄂等一面奏聞一面報大將軍圖海知

之

壬午

命大將軍貝勒洞鄂等勦賊通秦州餉道

提督王進寶等奏言賊薄秦州屯踞北山斷臨

鞏道秦州軍需無從而得且兵力單弱戰守皆

難

上諭大將軍貝勒洞鄂及將軍席卜臣佛尼勒都統赫  
業總督哈占巡撫杭愛華善提督王進寶等逆賊來

犯秦鞏如何攻禦大兵糧餉如何輓運不絕其共酌  
便宜以行至席卜臣既遣岑蘭大聶勒庫率兵三百  
赴隴州隴州副都統希福亦宜酌量分兵至秦州應  
援

平定三逆方畧卷二十一

欽定四庫全書

平定三逆方畧卷二十二

康熙十五年三月癸未朔追封殉難海澄公黃芳  
度王爵其將士皆贈官有差

海寇圍漳州芳度獨力死守孤城堅拒逆賊康  
熙十四年十月初六日叛將吳淑等與賊通引  
鄭錦入城漳州遂陷芳度與標將蔡隆等力戰  
而死闔門老幼暨從弟芳世芳泰家屬同及於



難芳世以狀聞

上諭海澄公黃芳度自逆賊變亂以來矢志忠貞保守孤城勦殺逆賊屢建奇功及叛將吳淑勾引逆賊潛獻城池海澄公奮勇血戰闔家殉難以報國恩以盡臣節勲績茂著可優贈王爵如多羅郡王例遣大臣致祭令芳世仍襲海澄公爵芳泰給拜他喇布勒哈番其同時殉難副將蔡隆贈右都督遊擊朱武贈都督僉事各致祭一次廕子弟一人為守備外委官張

瓊陳謙戴鄰等俱贈都司僉事廕子弟一人以千總用

丙戌將軍佛尼勒等奏敗賊於秦州城北

二月二十五日逆賊吳之茂率兵萬餘逼犯秦州城北佛尼勒等同王進寶率滿漢兵奮擊大敗之殺偽總兵四人擒偽總兵及叅遊二百餘人斬賊二千餘級

庚寅大將軍和碩康親王傑書奏官兵敗賊於溫

州

偽都督曾養性偽將軍祖宏勳等於二月十七日率賊四萬餘水陸來犯將軍貝子傅喇塔遣副都統吉勒塔布沃伸巴圖魯等統滿洲蒙古綠旗官兵分路逆戰斬賊二萬餘曾養性棄馬赴水遁

趣大將軍康親王傑書等進兵

傑書疏言

臣

屢檄貝子傅喇塔速取溫州傅喇

塔乃稱溫州形勝非舟師不能攻取且衆趣副  
都統穆赫林吉勒塔布沃伸巴圖魯提督段應  
舉等皆瞻顧不前臣察處州台州杭州衢州駐  
兵皆不便輕發若大兵前進須別得官兵一枝  
方克有濟請調江寧廣信兩處兵并調崇明京  
口戰船水師以資進剿

上諭貝子傅喇塔始以待發紅衣礮為辭今又云必須  
戰船且覽衆次移文前後互異初無定見殊負委任

我朝用兵紀律嚴肅從未有官兵抗違主帥不遵號令者今副都統穆赫林吉勒塔布沃伸巴圖魯提督段應舉等違令不前蔑視國法俟事平日嚴治其罪至江寧廣信兵已經調發吉安別無可發之兵崇明京口係瀕海重地舟師不可分遣況王奏報溫州大捷斬獲二萬餘級則餘賊無多何難翦滅速復溫州且命王為大將軍專委以戡定閩疆并非欲王安居閑地但分遣諸帥而已今王坐守金華將及二載徒

以文移往來為事不親統官兵進剿則逆賊何日可滅王其速檄貝子傅喇塔刻期取溫如或不能即撤傅喇塔還暫駐金華王親往溫州督兵攻取克復之日合兵進取福建毋得仍前瞻望貽誤軍機負朕委任之意

趣大將軍貝勒尚善等進兵

尚善等奏

臣

聞安親王已至袁州即欲統兵前

發但值久雨軍器難施若欲破賊濠拔其樁我

金史卷之二十二  
卷二十二  
兵必致勞疲因是未敢輕動

上諭尚善等統率太兵靜坐日久未移寸步朕屢授軍  
機惟以雨雪為辭蹶躅不前無非各持保身之計今  
安親王已復萍鄉醴陵進取長沙豈湖南逆賊不防  
他處獨固守岳州邪由此觀之繫征勦之力與不力  
亦甚顯然矣爾等宜痛改前非奮力用命乘湖南逆  
賊騷動之時仍遵前旨速行進兵毋失機會

癸巳

命大將軍順承郡王勒爾錦等乘機進兵

大將軍貝勒尚書等奏偵得逆賊吳三桂遣偽將軍馬寶及彞陵南漳諸處賊兵分路應援長

沙

上諭大將軍安親王兵已深入賊赴援甚衆恐致相持稽延時日貝勒尚書等宜乘機速取岳州儻未可取則分兵繞過岳州絕賊餉道若慮岳州兵單可調武昌兵以資防守其彞陵諸處賊勢既分順承郡王勒



爾錦貝勒察尼等或攻彞陵逆賊或整理舟師以張  
渡江之勢俾賊撓亂不能救援長沙儻有隙可乘即  
渡江酌量以行至南漳逆賊既退可調南漳諸處大  
兵赴荊州併力破賊大將軍王等仍量留官兵同總  
兵官劉成能防守南漳

尋荊州坐塘筆帖式報大將軍王已撤彞陵南  
漳諸處滿兵合荊州兵令貝勒察尼守荊州王  
親統大兵同總督蔡毓榮擬於本月十八十九

日間渡江前進

上諭渡江進勦事關重大大將軍王等仍宜相機行事  
勿得輕敵

甲午大將軍順承郡王勒爾錦奏官兵敗賊於南  
漳

時將軍噶爾漢等偵知逆賊有移動狀即遣叅  
領該斯海等先取靈機寨噶爾漢親率滿漢蒙  
古兵攻賊大營於是月初一日師次太公山值

賊三千餘出營拒敵我兵分擊敗之追至馬駿  
嶺賊遂潰遁

己亥大將軍貝勒尚善等奏官兵克君山

尚善等於是月初九日分布陸路官兵為進取  
之勢以護軍統領額司泰督舟師入湖賊艘數  
百餘橫列南潯港君山諸處奮擊皆敗之克復  
君山岳州城下賊船來援我兵復擊敗之追十  
餘里擒斬甚多獲船五十餘

辛丑

詔發兵援湖南

上諭議政王等岳州尚未恢復而大將軍安親王軍已  
深上湖南亟宜增遣大兵應援大將軍圖海兵尚餉  
馬懷慶應以戍守河南兵每佐領驍騎一人選才能  
者署為夸蘭大率赴岳州其叅領瑚什巴額勒布至  
懷慶且令暫駐更發京師每佐領驍騎一人與盛京  
兵一千五百人合為一營令叅領達漢泰沙禮領之

速行抵河南日留盛京兵五百人付瑚什巴等防戍  
河南府餘令達漢泰等率赴岳州前者大將軍貝勒  
尚善等奏請增發每佐領兵四人便可分兵由雲溪  
驛赴長沙今所發禁旅併河南盛京兵已足每佐領  
四人之數此兵未到時若長岳二郡尚未收復大將  
軍安親王酌撥官兵疾援長沙與大將軍安親王合  
兵攻長沙定湖南其盛京兵千人速遣發大將軍圖  
海軍前

壬寅追封提督陳福公爵

先是福以兵亂遇害報至

上命總督哈占等察其情狀以聞至是哈占奏據陳福

族弟禎言福為賊所害賊即乘夜南奔約二百

餘人

上諭提督陳福忠貞素篤為國忘家勦除逆賊恢復疆  
土勞績茂著茲統兵進勦身殞行間深可憫惻著優  
贈公爵加為三等精奇尼哈番令其世襲賜祭二次

庚戌大將軍順承郡王勒爾錦奏帥師渡江時大將軍安親王岳樂兵抵長沙彝陵賊勢既分

上趣荊州大兵渡江於是順承郡王勒爾錦量撤宜都彝陵南漳兵授貝勒察尼靖寇將軍印以兵一千留守荊州躬與諸大臣統滿洲蒙古漢軍綠旗兵於是月十八日啟行至文村渡江敗賊於石首虎渡口諸處焚其二營又察尼於十九日遣署都統多謨克圖副都統巴喀等統兵渡江

敗賊於太平街焚其營我舟皆在南岸逼太平

街而泊

命將軍佛尼勒等邀擊來援秦州賊兵

佛尼勒等奏平涼偽總兵李國良王繼禎率賊  
八千餘由靖寧來援秦州

上諭將軍佛尼勒等頃於秦州敗逆賊吳之茂是以王  
輔臣遣李國良等應援宜速行邀擊毋使逆賊得以  
并力將軍佛尼勒張勇巡撫華善等其共相籌度隨



宜調遣勦滅秦州賊寇恢復靖寧

壬子改貴州提督趙賴為江西吉撫等處提督貴州總兵官馬雲程為九江總兵官

時大將軍簡親王喇布奏江西綠旗官兵無可調遣請以見駐九江貴州提督趙賴改為吉安撫州等六府提督調至南昌同大兵恢復吉安諸處提督趙國祚俟其旋師之日即統所部兵為九江袁州等六府提督又請以見駐湖口貴

州左路總兵官馬程雲改為九江總兵官

上允其請又

諭喇布曰吉安繫廣東要路宜速恢復乃以調綠旗兵  
為辭因循日月殊誤軍事今不必俟提督趙賴官兵  
即遣將軍哈爾噶齊額楚等恢復吉安以通粵道

平定三逆方畧卷二十二